

1.2 Resúmen

Último añanan, tin mas di 4.000 petishon di pèrmit di trabou (TWV) ta drenta serka gobièrnu kada aña. Dunamentu di pèrmit di trabou ta un proseso delikado ku ta enbolbé interes finansiero i ekonómiko kuantioso. P'esei mes, ta eksistí e peliger ku lo por malusá Landsverordening Arbeid Vreemdelingen (Lv AV, Ordenansa Nashonal riba Labor di Stranhero) òf a lo ménos us'é na un manera ku no ta kuadra ku e intenshon su tras. Ta pa e motibu ei Kontraloria a disidí di hasi un investigashon pa determiná te na ki grado dunamentu di pèrmit di trabou ta sosodé konforme lei i si a buk tur e pagonan ku mester a tuma lugá pa e añanan 2011, 2012 i 2013. Ta bini aserka ku e resultadonan di un estudio ku Stichting Overheidsaccountantsbureau (SOAB) a hasi na 2009 tabata asina alarmante ku Kontraloria a konsiderá ku un investigashon lo ta na su lugá, pa determiná si e trayekto di mehoramentu ku a inisiá e aña ei a base di tal resultadonan a hiba na un organisashon interno ku ta garantisá ku dunamentu di pèrmit di trabou ta sosodé konforme loke tin fihá den Lv AV.

Tokante si dunamentu di pèrmit di trabou ta sosodé òf nò konforme lei, e konklushon ku Kontraloria ta yega na dje ta ku en partikular e proseso di dokumentashon, e kontrol interno i e supervishon ta insuficiente pa garantisá ku dunamentu di pèrmit di trabou ta sosodé konforme lei.

Tur e pèrmitnan di trabou ku Kontraloria a investigá tabata duná na un manera ilísito, ya ku a trata e petishonnan en kuestion apesar ku nan no tabata kumpli ku e eksigensianan fihá den lei. Ademas, e failnan korespondiente ta mustra ku no a hasi suficiente investigashon pa wak si tabatin trahadó disponibel riba merkado lokal pa e vakatura en kuestion.

E pèrmitnan di trabou otorgá a base di e asina yamá 'prosedimentu aselerá' ('versnelde procedure'), ku antiguo Kolegio Ehekutivo di Kòrsou a fiha na 2003 pa sierto empresa i sektor, tambe tabata duná na un manera ilísito for di punto di bista formal i pues tabata 'contra legem' (kontra lei), ya ku e desishon mensioná ta karesé di base hurídiko.

Ademas, den 60% di e kasonan investigá, tratamentu di e petishon a dura mas ku e plaso legal di 6 siman. Ta bin aserka ku ya pa añanan largu e departamento ku ta evaluá e petishonnan a bin ta sufri di un falta struktural di personal, no opstante e intentonan hasí pa tuma mas personal den servisio. Mientras ku e investigashon tabata andando, a sosodé

na dos okashon ku, despues di un proseso di rekrutamentu i selekshon, Minister a desviá for di e konsehonan ofisial, loke a hiba na retraso den e proseso.

Pa garantisá ku dunamentu di pèrmit di trabou ta sosodé conforme lei i denter di e tempu stipulá, Kontraloria a konsehá, entre otro, pa pega estríktamente na lei ora di prosésá e petishonnan, hisa kalidat di e investigashon den kua ta determiná si e solisitante ta bini na remarke pa un pèrmit di trabou, i tuma sufisiente personal kualifiká den servisio na e departamento ku ta evaluá e petishonnan.

Pa loke ta trata bukmentu di tur e pagonan ku mester tuma lugá, Kontraloria ta konkluí ku ta keda eksistí insertidumbre al respekto, ya ku no tin manera di hasi kontrol interno pa determiná si loke a buk ta kompleto.

Kontraloria a konsehá pa determiná, kada tantu tempu, si a buk e entradanan den nan totalidat òf nò.

Pa loke ta trata e proyekto di mehorashon inisiá na fin di 2009, Kontraloria ta konkluí ku e esfuersonan hasí den e kuadro ei ainda no a pone ku e proseso di duna pèrmit ta keda denter di e plaso di 6 siman fihá den lei, ni pa e proseso kana conforme loke tin fihá den lei. Tampoko no a logra pa e sistema outomatisá funshoná optimalmente, i ku e trayekto di mehorashon no ta kompletá ainda.

For di 2013, a tuma diferente medida ku lo mester a hiba na mehoramentu. Ainda no por ehekutá e plannan formulá pa logra esei debí ku ainda Minister no a fiha e plannan akí formalmente.

Kontraloria a konsehá pa laga Minister fiha e plannan di mehoramentu, pa despues ehekutá nan. Relashoná ku outomatisashon, Kontraloria ta konsehá pa bini ku un sistema outomatisá konfiabel pa apoyá i vigilá e proseso, i sòru pa e proseso di dunamentu di pèrmit sosodé conforme lei.

Resumiendo, Kontraloria ta konkluí ku evidentemente un práktika ilísito a desaroyá den dunamentu di pèrmit di trabou, unu ku ta 'contra legem' (kontra di lei), esta, na konflikto ku e intenshon ku e legisladó tabatin na mente, di protegé merkado laboral na fabor di hende lokal ku ta buska trabou i di fomentá empleo lokal. Na opinion di Kontraloria, e práktika ilísito konstatá ta bai gravemente kontra boluntat di e legisladó i komo tal tambe kontra e normanan generalmente aseptá tokante funshonamentu di un estado di derecho demokrátiko. Kontraloria ta di opinion ku e situashon akí ta rekerí intervenshon inmediato di parti di Parlamento i minister di SOAW, mediante medida korektivo ku lo imponé i garantisá aplikashon korekto di lei.